

UNIVERZITET U SARAJEVU
FILOZOFSKI FAKULTET

POSLOVNIK O RADU
VIJEĆA
FILOZOFSKOG FAKULTETA
UNIVERZITETA U SARAJEVU

Sarajevo, maj 2016.



Na osnovu člana 124. Zakona o visokom obrazovanju–prečišćeni tekst ("Službene novine Kantona Sarajevo", broj: 42/13.), Zakona o izmjenama Zakona o visokom obrazovanju („Službene novine Kantona Sarajevo“, broj: 13/15.), člana 92. i 214. Statuta Univerziteta u Sarajevu, Vijeće Filozofskog fakulteta Univerziteta u Sarajevu na 21. redovnoj sjednici održanoj 14. 6. 2016. godine, *donijelo je*

POSLOVNIK
o radu Vijeća
Filozofskog fakulteta
Univerziteta u Sarajevu

I. OSNOVNE ODREDBE

Član 1.

Ovim Poslovnikom utvrđuje se rad Vijeća Filozofskog fakulteta Univerziteta u Sarajevu i njegovih članova a naročito: način sazivanja sjednica, utvrđivanje dnevnog reda, predsjedavanje, učešće u radu sjednica, održavanje reda na sjednicama, odlučivanje i vođenje zapisnika.

Član 2.

Vijeće Filozofskog fakulteta Univerziteta u Sarajevu je stručno tijelo Fakulteta, u skladu sa Zakonom.

Član 3.

Vijeće Fakulteta u skladu sa Zakonom i Statutom Univerziteta u Sarajevu čini akademsko osoblje iz reda nastavnika, najmanje po jedan predstavnik asistenata i viših asistenata i najmanje tri studenta, vodeći računa o godinama studija i ciklusima studija.

Prijedlog predstavnika asistenata i viših asistenata za članove vijeća Fakulteta predlažu asistenti i viši asistenti Fakulteta.

Studentska organizacija Fakulteta predlaže najmanje tri studenta koji prisustvuju sjednicama Vijeća Fakulteta vodeći računa o godinama studija i ciklusima studija.

Član 4.

Mandat predstavnika studenata u Vijeću Fakulteta traje jednu godinu.

Član 5.

Prisustvo sjednicama Vijeća Fakulteta je obavezno.

U slučaju spriječenosti prisustvu sjednici Vijeća Fakulteta (bolest, odsustvo), član Vijeća dužan je opravdati odsustvo šefu Službe za nastavu, pismeno ili usmeno.

Članu Vijeća Fakulteta koji dva puta uzastopno ne prisustvuje Vijeću i ne opravda izostanke, dekan Fakulteta izriče mjeru upozorenja na prvoj narednoj sjednici Vijeća, na kojoj se član Vijeća pojavi, a ako se takvi slučajevi nastave snosit će novčanu sankciju u vidu odbijanja toplog obroka za taj dan.

Član 6.

U pravilu u toku akademske godine održavaju se četiri sjednice Vijeća Fakulteta, po dvije u svakom semestru, a po potrebi mogu se održavati i češće.



Član 7.

Sjednice Vijeća Fakulteta mogu se, ako je to neophodno, zbog hitnosti rješavanja određenog pitanja iz nadležnosti Vijeća, održati i u elektronskoj formi, i to samo onda ako postoji usaglašen prijedlog odluke na sjednici odsjeka/katedre.

II. SAZIVANJE SJEDNICE

Član 8.

Obavještenje o potrebi održavanja sjednice Vijeća Fakulteta upućuje se predsjednicima vijeća nastavno-naučnih odsjeka/katedri Fakulteta, 20 dana prije dana određenog za održavanje sjednice.

Na osnovu obavještenja iz tačke 1. ovog člana predsjednici vijeća nastavno-naučnih odsjeka/katedri Fakulteta su obavezni sazvati sjednice vijeća odsjeka/katedri u roku od pet dana i na istim se pripremaju materijali za predloženu sjednicu Vijeća Fakulteta.

Stručne službe Fakulteta dužne su u roku od deset dana pregledati materijale sa odsjeka/katedri Fakulteta, te sačiniti prijedlog dnevnog reda i prijedloge odluka, zaključaka, po usvojenim materijalima sa odsjeka/katedri Fakulteta i isti dostaviti dekanu Fakulteta.

Član 9.

Nakon što izvrši uvid u ostavljene materijale i obrađene prijedloge od strane Stručnih službi, dekan Fakulteta utvrđuje konačan dnevni red.

Član 10.

Dnevni red sa materijalima, izvodom iz zapisnika sa prethodne sjednice, prijedlozima odluka, dostavljaju se elektronskim putem svim članovima Vijeća Fakulteta pet dana prije održavanja sjednice.

Dnevni red iz tačke 1. ovog člana dostavlja se u printanoj formi dekanu, stručnoj službi i arhivi Fakulteta.

Član 11.

Elektronske sjednice Vijeća Fakulteta zakazuju se izuzetno, u slučaju hitnosti, u cilju obavljanja poslova iz nadležnosti Vijeća. Na sjednicu se stavljaju samo pitanja o kojima postoji saglasnost odsjeka/katedri (imenovanja komisija za izbor nastavnika i saradnika, imenovanje komisija za sticanje magisterija i doktora nauka po ranijem sistemu studiranja, imenovanje komisija i oglašavanja doktorata prema Bolonjskoj shemi studiranja, usvajanja završnih diplomskih radova, gostovanja, angažovanja nastavnika i saradnika, nostrifikacija, usvajanja usaglašenog teksta akata Fakulteta, ako su prošla postupak javne rasprave na komisiji, ukoliko postoji usaglašen zahtjev na odsjeku/katedri.)

Sjednica iz stava 1. ovog člana saziva se i održava u vremenskom razdoblju od pet dana od dana oglašavanja elektronske sjednice na web stranici Fakulteta.

Član 12.

Služba za nastavu i Služba za informatičku podršku Fakulteta obezbjeđuju uslove za dostavljanje materijala iz član 10. i 11. ovog Poslovnika (prilog Poslovnika).



III. DNEVNI RED

Član 13.

Dnevni red sjednice Vijeća predlaže dekan, a utvrđuje ga Vijeće na početku sjednice.

Član 14.

Prijedlog za unošenje pojedinih pitanja u dnevni red sjednice vijeća imaju pravo da podnesu članovi Vijeća.

Član 15.

Prijedlozi za unošenje pojedinih pitanja u dnevni red sjednice Vijeća podnose se dekanu pismeno.

Prijedlozi se mogu podnijeti u periodu od dostavljanja materijala za sjednicu Vijeća do samog održavanja sjednice.

Član 16.

Članovi Vijeća mogu i na sjednici Vijeća predložiti stavljanje određenog pitanja na dnevni red, ali su dužni obrazložiti hitnost prijedloga koji treba staviti na dnevni red.

Vijeće glasanjem odlučuje da li će predloženo pitanje biti uvršteno u dnevni red.

IV PREDSJEDAVANJE I UČEŠĆE NA SJEDNICAMA

Član 17.

Sjednicama Vijeća Fakulteta predsjedava dekan, a u njegovoj odsutnosti po ovlaštenju prodekan Fakulteta, odnosno ovlaštenu član Vijeća.

Član 18.

Sjednicama Vijeća Fakulteta prisustvuju sekretar Fakulteta i lica potrebna za obrazloženje određenih prijedloga ili obradu sjednice, bez prava odlučivanja.

Član 19.

Na početku sjednice Vijeća, dekan ocjenjuje da li postoji kvorum za rad.

Ukoliko se ustanovi da ne postoji kvorum, održavanje sjednice se odgađa.

Član 20.

Ukoliko dekan konstatuje da je prisutna većina članova Vijeća Fakulteta, Vijeće može početi sa radom.

Nakon usvajanja izvoda iz zapisnika sa prošle sjednice i predloženog dnevnog reda, prelazi se na razmatranje pojedinih pitanja prema utvrđenom i usvojenom dnevnom redu.

Član 21.

Dekan daje članovima Vijeća Fakulteta riječ po redu prijavljivanja.

Član 22.

Dekan zaključuje razmatranje pojedinog pitanja kada ustanovi da nema više prijavljenih govornika.



Trajanje izlaganja članova Vijeća Fakulteta teče kako slijedi: uvodno izlaganje traje najviše 5 minuta, diskusija najviše 3 minute, a replika najviše 2 minute.

Član Vijeća može o istom pitanju govoriti najviše dva puta.

V ODRŽAVANJE REDA NA SJEDNICI VIJEĆA

Član 23.

Dekan se brine da učesnik u raspravi ne bude ometan u toku izlaganja.

Učesnik u raspravi može govoriti samo o pitanju koje je na dnevnom redu.

Ako se udalji od dnevnog reda, dekan će ga pozvati da se istog drži. Ako se učesnik u raspravi i poslije opomene ne bude držao reda, dekan mu može oduzeti riječ.

Član 24.

O redu na sjednici Vijeća Fakulteta brine se dekan.

Za povredu rada na sjednici mogu se izreći mjere: upozorenje, oduzimanje riječi i udaljenje sa sjednice.

Član 25.

Mjera upozorenja izreći će se članu Vijeća Fakulteta koji svojim ponašanjem, upadanjem u riječ drugom učesniku u raspravi ili sličnim postupkom na sjednici narušava red i odredbe ovog Poslovnika.

Mjeru upozorenja i oduzimanja riječi izriče dekan.

Član 26.

Mjera udaljenja sa sjednice izriče se članu Vijeća Fakulteta koji neće da postupi po naređenju dekana koji mu je oduzeo riječ.

Član Vijeća Fakulteta može biti udaljen sa sjednice na kojoj je povrijedio red.

Mjera udaljenja izriče se na prijedlog dekana ili jednog člana kojeg podrži većina prisutnih članova Vijeća Fakulteta.

Član Vijeća Fakulteta prema kojem je izrečena mjera udaljenja sa sjednice, dužan je odmah se udaljiti.

O pravu i obavezi dekana da izrekne mjeru ne glasa se.

Član 27.

Ako dekan ne može redovnim mjerama održati red na sjednici, predložiti će kratak prekid sjednice.

VI ODLUČIVANJE NA SJEDNICI

Član 28.

Vijeća Fakulteta donosi odluke, zaključke i prijedloge većinom glasova ukupnog broja članova.

Radi utvrđivanja da li sjednici prisustvuje većina, na početku sjednice vrši se svojeručno potpisivanje na listu evidencije za sjednicu koja se održava.

Član 29.

Svaki član Vijeća Fakulteta ima pravo da prije glasanja obrazloži svoj stav.

Obrazloženje ne može trajati duže od dvije minute.

Član 30.

Glasanje je, u pravilu, javno.

O pojedinim pitanjima Vijeća Fakulteta može odlučiti i da tajno glasa.

Članovi Vijeća Fakulteta glasaju na taj način da se izjašnjavaju za prijedlog ili protiv njega.

Javno glasanje vrši se dizanjem ruke.

Vijeće glasa tajno o predmetu za koji je zakonom utvrđeno da se odluke donose tajnim glasanjem kao i u drugim slučajevima gdje nije odlučeno da se glasa tajno.

Član 31.

Javno glasanje može se vršiti i poimeničnim izjašnjavanjem.

Poimenično glasanje vrši se kada dekan smatra da je to potrebno radi tačnog utvrđivanja rezultata glasanja ili ako to zatraži jedan član Vijeća Fakulteta i njegov zahtjev podrži najmanje trideset članova.

Poimenično glasanje vrši se na taj način da se svaki prozvani član Vijeća Fakulteta izjašnjava "ZA" ili "PROTIV".

Član 32.

Po završenom glasanju dekan utvrđuje rezultat glasanja i na osnovu toga objavljuje da je prijedlog o kojem se glasalo prihvaćen ili odbijen.

Član 33.

Ako pojedinom članu Vijeća Fakulteta neko pitanje nije dovoljno jasno, pa mu ta činjenica otežava izjašnjavanje prilikom glasanja, ima pravo na dodatne informacije bilo od predsjednika vijeća odsjeka/katedre, predsjednika ili člana određene komisije, šefova Službi ili sekretara Fakulteta, prodekana Fakulteta ili dekana Fakulteta.

Član 34.

Ukoliko se glasanje provodi na elektronskoj sjednici Vijeća Fakulteta, glasanje se vrši na način da svaki član Vijeća Fakulteta putem službenog e-maila glasa na način kako je dobio u uputi o načinu glasanja u period od dostavljanja materijala do vremena označenog za glasanje na dan kada se održava elektronska sjednica.

Glasanje se vrši izjašnjavanjem svakog člana Vijeća Fakulteta "ZA" ili "PROTIV". Odluka je donesena ako je za nju glasala većina članova Vijeća Fakulteta.



VII ZAPISNIK-ZAKLJUČCI SA SJEDNICE

Član 35.

Na sjednici Vijeća Fakulteta vodi se zapisnik. Zapisnik na sjednici vodi stručna služba Fakulteta.

Član 36.

- Zapisnik sa sjednice Vijeća Fakulteta sadrži naročito:
- označenje sjednice (redovna, vanredna, e-sjednica)
 - vrijeme i mjesto održavanja sjednice
 - podatke o pravdanju izostanaka sa prošle sjednice
 - podatke o usvajanju odluka, zaključaka sa prošle sjednice
 - dnevni red sjednice
 - tok i sadržaji diskusije i donijete odluke i zaključke
 - izdvojena mišljenja i
 - ostale događaje na sjednici.

Član 37.

Na osnovu sastavljenog zapisnika, zapisničar u roku od osam dana od dana održavanja sjednice sastavlja izvod iz zapisnika. Izvod iz zapisnika je sastavni dio zapisnika, nakon sjednice.

Rok za izradu konačnih odluka, rješenja, zaključaka, mišljenja i sl. je pet dana od dana održavanja sjednice Vijeća Fakulteta.

Član 38.

- Izvod iz zapisnika Vijeća Fakulteta sadrži:
- označenje sjednice (redovna, vanredna, e-sjednica)
 - datum i mjesto održavanja sjednice
 - označenje prisutnih i odsutnih članova (poimenično)
 - podatke o usvojenim odlukama, zaključcima sa prošle sjednice
 - izdvojena mišljenja članova Vijeća Fakulteta
 - dnevni red sjednice
 - usvojene zaključke i odluke.

Član 39.

Izvod iz zapisnika Vijeća Fakulteta sa sjednice Vijeća Fakulteta dostavlja se uz poziv za narednu sjednicu tako da su o radu upoznati svi članovi Vijeća Fakulteta.

VIII ZAVRŠNE ODREDBE

Član 40.

Na osnovu usvojenog Poslovnika o radu izvršit će se usaglašavanje Poslovnika o radu vijeća nastavno-naučnih odsjeka/katedri Fakulteta.

Član 41.

Poslovnik stupa na snagu osmog dana od dana objavljivanja.

Član 42.

Tumačenje odredaba Poslovnika daje Vijeće Fakulteta.



UNIVERZITET U SARAJEVU
FILOZOFSKI FAKULTET
Vijeće Fakulteta
Broj: 02-01/222
Sarajevo, 14. 6. 2016. godine.

Na osnovu člana 124. Zakona o visokom obrazovanju–prečišćeni tekst (“Službene novine Kantona Sarajevo”, broj: 42/13.), Zakona o izmjenama Zakona o visokom obrazovanju („Službene novine Kantona Sarajevo”, broj: 13/15.), člana 92. Statuta Univerziteta u Sarajevu i člana 262. Pravila Filozofskog fakulteta u Sarajevu (Prečišćeni tekst), Vijeće Fakulteta na 21. redovnoj sjednici održanoj 14. 6. 2016. godine, *donijelo je*

ODLUKU

I

Usvaja se **POSLOVNIK O RADU VIJEĆA FILOZOFSKOG FAKULTETA UNIVERZITETA U SARAJEVU.**

II

POSLOVNIK O RADU VIJEĆA FILOZOFSKOG FAKULTETA UNIVERZITETA U SARAJEVU iz stava I. ove odluke sastavni je dio ove odluke.

III

Odluka stupa na snagu danom donošenja.

IV

Stupanjem na snagu ovog Poslovnika prestaju da važe odredbe Poslovnika o radu Nastavno-naučnog vijeća Filozofskog fakulteta Sarajevo, broj: 02-01/54-1 od 7. 3. 2003. godine.

DOSTAVITI:

1. Uz Poslovnik
2. Uz zapisnik
3. Arhiva



DEKAN FAKULTETA

Prof. dr. Salih Fočo